

saul van messel

twijspaalk mien bloasbaalk

gedichten

twijspaalk
mien bloasbaalk

veur die
– ook dizze raais –

dook over ons laid
rook over ons laid
wél dij dit leest
begriipt mie nait

saul van messel

twijspaalk mien bloasbaalk

gedichten

van der veen

1970

winschoten

twijspaalk

bie n aander over deel
hangst aan mien woord
as aan n zeel
doe mien laid

dat mie as
vremd cogn dwingt
en doe — doe staist
dr boetn zingt

mien bloasbaalk

onder mien vaarzen
smeuln jeudn
onder mien aaske
speuln kolen
van polder tot polen

gevuileg

bie wordn laans
vuil ik mie vremd en aans –
ainmoal veurbie
heur ik heur melodie

juchtern

twijduuster

doe blinde middag
zet dien fokke op
schip van de oavmd komt
mit opgestreekn zailn

hail vremde dreumn
zètn tied op kop
de schare brekt mie
in twij dailn :

wat dee de dag
mit al mien dichterlek geschrief

wat dut de naacht
ook as ik wakker blief

piene

doe smuie toal
in t zaacht gedicht
wèl dij dien
haarde noagels zugt

en wèl dij vuilt
doe toal zo smui
hou zeerstoe dust
as ik die spui

toal op oafstand

mien voaders verstaarf
ik heur die hier

woord op mien waarf
ik boeg die mit wier

veuroetzicht

as boonaartn
stoan mien vaarzen
nog in twijblad

moar ik zai
ze al dreugn
op de beune

beeld

bron

oet mien guster
spijt mien laid
dijt mien woord
as roezend rait

sjabbes

gain kraande scheurn
sjoele goan

aanders weezn
aanders bliedm

tuzzen kip kap kogel
en widde wievm

sjoel is kaark wòrn

god hèt hier boomn kapt
dat waitn mien woddels :

moar dij tronkn
dij bliev
in mien bonkn

jeudnmonument

vlaag in top
moar grond blift kold
doe komst mit zold
moar t aai is op

auschwitz

haand in haand
spoukn jeudn
swaart as de nacht
boovm dit laand

spouk aan spouk
boovm de groavm
swaart as rouk
vlaign roavm

boovm dij roavm
swaart as de nacht
stait god bie dij
groavm op wacht

?

dou ik die zöcht
op kold pampier
waazt doe weer vòt
en ik bleef hier

moar as ik die
ais bie mie wait
din stoekn woordn
in mien laid

in memoriam patris
31-10-1923

maivm widde vogels
mag ik mit joe mit

vlaign boovm boomn
mit joen schaarpe snit

maivm swaarde vogels
boden veur de störm

dou ik joe zaag koomn
is mien pabbe sturm

over de spaigel
hangt moeke wit loakn

klokke stait stil
en gedienn hangn slicht

pabbe is dood
twij jeudn koomn woakn

hou laank hèst doe wacht
doe mien smale gedicht

bie jeudn maag n liek tot aan de begraftenis nait
allinig blievem

schoon schip

mit zien woord
keunink te riek
moakt mien laid
mien laaie liek

jeugd

melancholie

haarstbloarn broen en rood
de locht hail wiede :
veurbode van de dood
komt op verziende

aaltied

in t loug / bie t verloat
hail vroug en hail loat
doe staaist op mien bozzem :
vrouger mien blözzem

dialogoog

— ik bin ja veuls te groot
en doe bist veuls te klain —

— loat mie nait lös
ik kin nait zain —

blinde meneuvels
reukeln deur de nacht

— hai gèft verloorn —
heur ik zacht

winschoot

mit jeugd beloadn
krek as mien laid
binn' dizze stroatn

vol van wat waas
en hail nait liekt
moar toch deur t glaas
noar boetn kikt

boeskool

21-10-1969

mit daauwdrupm op
zien bloarn loat zai
n boeskool zain :
vrucht van heur laand

dij ligt hail rusteg
gruineg blaauw
en vochteg
in heur haand

ik dink aan
„dauw hangt parelen”
van j. h. leopold

zai komt oet
aikamp dicht
bie finnerwold

associatie

hoavengoa bie ons in stroade
waas smid en woagnmoaker

kek as de voader
van josef haydn

hou is t in de wereld meugelk

in de train

verweerd gezicht
van ôlle vraauw
teert mien gedicht
as taauw

foxhol

aibers voarn deur de locht
coasters over wereldzeeën;
waarvm aan dit braide daip –
roemte : doe mien hakkezeen'

goorecht

doe baange sloot
kroep op mien schoot
doe laange baarm
kom in mien aarm

fatum

dommit komt de dood
op de wies van de wind
ik heur hom al zingn :
hou kin t

du bist wie eine blume

op het graf
van heinrich heine
ligt n haile
zwoare staine

onder dizze
staine ligt
doezend ainmoal
lichtgewicht

lichtgewicht
van soezend laid
achter baarm
roezend rait

blaauwe zaachte
koornbloume
heinrich heine
dij ik roume

onder haile
zwoare staine
in zien graf
nooit meer allaine

achterberg

hai keukelt woordn
oet zien houd
hai teuvelt woordn
oet zien bloud

din vlogt hai
licht as vogelveern
deur doezend wonder
noar zien steern

veur simon van wattum

wie speuldn
in de beersterstroade –
waist doe dat nog

doe waazt
nog nait geboorn –
wie speuldn toch

den dichters leevm
boetn roemt' en tied

as kinder
zo blied

keurmeester

onzichtboar drokt
onzichtboar laid
zien blaauwe stempel
in mien vlais

inhold		
	twijspaalk / mien bloasbaalk	7
	gevuileg	8
juchtern		
	twijduuster	10
	piene	11
	toal op oafstand	12
	veuroetzicht	13
	beeld	14
	bron	16
jeude		
	sjabbes	17
	sjoel is kaark wörn	18
	jeudnmonument	19
	auschwitz	20
	?	21
	in memoriam patris	22 / 23
	schoon schip	24
jeugd		
	melancholie	26
	aaltied	27
	dialogoog	28
	winschoot	29
	boeskool	30
	associatie	31
	in de train	32
	foxhol / goorecht	33
	fatum	34
joe		
	du bist wie eine blume	36
	achterberg	37
	veur simon van wattum	38
	keurmeester	39